

МЭДЭЭЛЭЛ, ХАРИЛЦАА ХОЛБООНЫ ТОНОГ ТӨХӨӨРӨМЖИЙГ БАТАЛГААЖУУЛАХ ЖУРАМ

Нэг. Зорилго

1.1. Мэдээлэл, харилцаа холбооны тоног төхөөрөмж (цаашид “тоног төхөөрөмж гэх”)-д баталгаажуулалт, тохирлын үнэлгээ хийх нь дараах зорилготой:

1.1.1. Хүний эрүүл мэнд, хүрээлэн байгаа орчны аюулгүй байдал, радио давтамжийн талаар холбогдох стандарт, норматив техникийн баримт бичиг, тогтоосон шаардлага хангасныг нотлох,

1.1.2. Стандартчилал, техникийн зохицуулалт, тохирлын үнэлгээний итгэмжлэлийн тухай хууль болон тохирлын баталгаанд заавал хамрагдах бүтээгдэхүүн, үйлчилгээний жагсаалтын хэрэгжилтийг хангах,

1.1.3. Тоног төхөөрөмжийг баталгаажуулах, баталгаажсан тоног төхөөрөмжид тохирлын гэрчилгээ олгох, хүчингүй болгох, хэрэгжилтэд хяналт тавих, түүнтэй холбоотой харилцааг зохицуулах,

1.1.4. Хэрэглэгчид зөв сонголт хийх боломж олгох, зах зээлд хуурамч болон стандарт шаардлагад нийцэхгүй бүтээгдэхүүн орж ирэхээс урьдчилан сэргийлж, нийтийн ашиг сонирхолыг хамгаалах.

Хоёр. Баталгаажуулалтын үйл ажиллагаанд баримтлах зарчим

2.1. Баталгаажуулалтын үйл ажиллагаанд дараах зарчмыг баримтална.

2.1.1. баримт, нотолгоонд үндэслэсэн байх,

2.1.2. үл ялгаварлахгүй байх,

2.1.3. шударга байх,

2.1.4. шуурхай, тасралтгүй байх,

2.1.5. нээлттэй, ил тод байх,

Гурав. Ерөнхий нөхцөл

3.1. Харилцаа холбооны зохицуулах хороо (цаашид “Зохицуулах хороо” гэх) нь Харилцаа холбооны тухай хуулийн 9 дүгээр зүйлийн 9.1.3, Радио долгионы тухай хуулийн 20 дугаар зүйлийн 20.3, Стандартчилал, техникийн зохицуулалт, тохирлын үнэлгээний итгэмжлэлийн тухай хуулийн 14 дүгээр зүйлийн 14.3-д тус тус заасны дагуу зах зээлд нийлүүлэх, нэвтрэх болон үйлдвэрлэсэн тоног төхөөрөмжийг тогтоосон шаардлагад нийцсэнийг тодорхойлон баталгаажуулж, тохирлын гэрчилгээ олгоно.

3.2. Баталгаажуулалтыг хэрэглээгээр нь 3 ангилна. Үүнд:

3.4.1. Импортын баталгаажуулалт;

3.4.2. Дотоодын үйлдвэрлэлийн баталгаажуулалт;

3.4.3. Экспортын баталгаажуулалт.

3.3. Монгол Улсын иргэн, хуулийн этгээд (цаашид “Хүсэлт гаргагч” гэх) нь эрх бүхий байгууллагаас баталсан тохирлын баталгаанд хамруулах бүтээгдэхүүний жагсаалтад¹ орсон тоног төхөөрөмжийг заавал баталгаажуулна.

3.4. Энэ журмын 3.4-д зааснаас бусад тоног төхөөрөмжийг сайн дурын үндсэн дээр баталгаажуулна.

3.6. Тоног төхөөрөмжид нэмэлтээр суурилуулж, нэгдэн ажиллах боломжтой, эд ангийг дангаар нь баталгаажуулж болно.

3.7. Нэг ижил төрлийн төхөөрөмжүүд буюу загварын дугаарууд нь өөр боловч лабораторийн сорилт, үйлдвэрлэгчийн мэдэгдэл нь ижил бол багц тоног төхөөрөмж гэж үзнэ. Хэрэв багц тоног төхөөрөмжийг нэг гэрчилгээнд бичих бол дөрөв хүртэлх загварын нэрийг бичнэ.

Дөрөв. Хүсэлт гаргах

4.1. Хүсэлт гаргагч нь тоног төхөөрөмжийг баталгаажуулах хүсэлтийг Зохицуулах хороонд цаасаар эсвэл цахимаар гаргана.

4.2. Хүсэлт нь монгол хэл дээр байх ба шаардлагатай тохиолдолд хавсаргах материалыг англи хэл дээр ирүүлж болно.

4.3. Баталгаажуулалт хийлгэх хүсэлтэд дараах баримт бичгүүдийг хавсаргана.

4.3.1. албан бичиг;

4.3.2. хүсэлт гаргагчийн мэдээлэл;

4.3.3. хүсэлт гаргагч болон үйлдвэрлэгч эсхүл нийлүүлэгчийн хамтын ажиллагааг баталгаажуулсан баримт;

4.3.4. үйлдвэрлэгч эсхүл нийлүүлэгчийн мэдэгдэл;

4.3.5. баталгаажуулах тоног төхөөрөмжийн мэдээлэл (танилцуулга, хэрэглэгчийн гарын авлага, ашиглалтын заавар, блок схем гэх мэт);

4.3.6. тоног төхөөрөмжийн зураг (гадна болон дотоод бүтэц);

4.3.7. зах зээлд нийлүүлэх тоног төхөөрөмжийн серийн дугаар;

4.3.8. холбогдох стандарт, бусад норматив баримт бичгийг сүүлийн 6 жилийн дотор хангасан сорилт туршилтын дүн.

4.4. Энэхүү журмын 4.3.8-д заасан сорилт туршилтын дүнд эрүүл мэнд, аюулгүй ажиллагаа (Health & Safety), цахилгаан соронзон зохицоо (Electromagnetic compatibility), радио давтамж (Radio frequency)-ийн мэдээллийг тусгасан байна.

4.5. Зохицуулах хороо нь тоног төхөөрөмжийг баталгаажуулж, тохирлын үнэлгээ хийхэд шаардлагатай тохиолдолд хүсэлт гаргагчаас тоног төхөөрөмжийн дээжийг авч болно.

¹ Засгийн газрын 2018 оны 291 дүгээр тогтоолын 1 дүгээр хавсралтаар батлагдсан “Тохирлын баталгаанд заавал хамруулах бүтээгдэхүүн, үйлчилгээний жагсаалт”-ын 85 дугаар бүлгийн 85.17, 85.25, 85.26, 85.27, 85.28 дахь зүйлд багтах бүтээгдэхүүн буюу тоног төхөөрөмж.

4.6. Энэхүү журмын 4.3-т заасан материал бүрдээгүй тохиолдолд тохирлын үнэлгээ хийхгүй бөгөөд материалыг цаасаар ирсэн тохиолдолд хүсэлт гаргачид буцаан хүргүүлнэ.

Тав. Тохирлын үнэлгээ хийх, шийдвэр гаргах

5.1. Стандартчилал, техникийн зохицуулалтын асуудал хариуцсан төрийн захиргааны байгууллагаас эрх авсан мэргэшсэн шинжээчийн эрхтэй тус хорооны ажилтан нь тохирлын үнэлгээг хийнэ.

5.2. Шаардлагатай тохиолдолд үнэлгээний ажлын хэсэг байгуулж болно. Ажлын хэсэгт мэргэжлийн, мэргэшсэн этгээдийг татан оролцуулж болно.

5.3. Мэргэшсэн шинжээч, ажлын хэсэг нь баталгаажуулалтын үйл ажиллагааны явцад олж авсан иргэн, хуулийн этгээдийн үйлдвэрлэлийн болон технологийн мэдээллийн нууцыг хадгалж, “амлалтын гэрээ” байгуулна.

5.4. Мэргэшсэн шинжээч, ажлын хэсэг нь ирүүлсэн материалыг үнэлэхдээ “Мэдээлэл, харилцаа холбооны тоног төхөөрөмжийг баталгаажуулах схем”-ээс тохирохыг сонгож, дүн шинжилгээ хийнэ.

5.5. Баталгаажуулахаар хүсэлт гаргасан тоног төхөөрөмжид хийгдсэн сорилтын дүн нь Монгол Улсын болон Олон улсын стандартыг хангах бөгөөд ажиллах радио давтамж нь Үндэсний радио давтамжийн хуваарилалтын хүснэгт, Зохицуулах хорооноос баталсан радио давтамжийн хуваарилалт, техникийн нөхцөл шаардлага, бусад холбогдох норматив техникийн баримт бичгийг хангасан байна.

5.6. Шаардлагатай тохиолдолд хүсэлт гаргагчийн баталгаажуулах тоног төхөөрөмжид газар дээрх үнэлгээг хийж болно.

5.7. Мэргэшсэн шинжээч, ажлын хэсэг нь тохирлын үнэлгээний дүгнэлт гаргаж, тайлан боловсруулна.

5.8. Зохицуулах хороо нь хүсэлт гаргагчаас ирүүлсэн хүсэлтийг хүлээж авснаас хойш ажлын 10 хоногийн дотор тохирлын гэрчилгээ олгох шийдвэр гаргах ба шийдвэр нь Зохицуулах хорооны даргын тушаал байна.

5.9. Тохирлын гэрчилгээг энэхүү журмын Хавсралт 3 “Мэдээлэл, харилцаа холбооны тоног төхөөрөмжийг баталгаажуулах схем”-д заасан хугацаагаар олгоно.

5.10. Тохирлын гэрчилгээ олгохоос татгалзсан тохиолд хүсэлт гаргагчид мэдэгдэнэ.

5.11. Тохирлын гэрчилгээг хүсэлт гаргагчийн хүсэлтэд үндэслэн монгол эсвэл англи хэл дээр гаргаж өгнө.

5.12. Тохирлын гэрчилгээнд дараах мэдээллийг тусгана:

5.12.1. Тохирлын гэрчилгээ эзэмшигчийн мэдээлэл,

5.12.2. Үйлдвэрлэгчийн мэдээлэл,

5.12.3. Тоног төхөөрөмжийн нэр, загвар, түүнтэй холбоотой мэдээлэл,

5.12.4. Үйлдвэрлэгч улс,

5.12.5. Тоног төхөөрөмжийн ажиллах радио давтамж, технологи, хангах стандарт,

5.12.6. Сорилт туршилт хийсэн лаборатори болон тайлангийн мэдээлэл,

5.12.7. Тохирлын үнэлгээний шийдвэр, шаардлагатай бол анх тохирлын гэрчилгээ авсан огноо,

5.12.8. Тохирлын гэрчилгээний хүчинтэй хугацаа.

5.13. Хэрэв хүсэлт гаргагч нь тохирлын гэрчилгээнд давтан тохирлын үнэлгээ хийлгэх бол хүчинтэй тохирлын гэрчилгээний хугацаа дуусахаас 30-аас доошгүй хоногийн өмнө Зохицуулах хороонд хүсэлтийг ирүүлнэ.

5.14. Зохицуулах хороо нь хүчинтэй тохирлын гэрчилгээнд тохирлын үнэлгээ хийх тохиолдолд энэхүү журмын 4.3.8-д заасан сорилт туршилтын хугацааг харгалзахгүй байж болно.

5.15. Энэхүү журмын 5.12.1-нээс 5.12.8 дахь заалтад заасан мэдээлэлд өөрчлөлт орсон тохиолдолд тохирлын үнэлгээг дахин хийнэ.

Зургаа. Шийдвэрийг мэдэгдэх, гэрээ байгуулах

6.1. Зохицуулах хороо нь хүсэлт гаргагчийн бүртгүүлсэн цахим хаягт тохирлын гэрчилгээ олгох тухай мэдэгдлийг тохирлын гэрчилгээ болон гэрээний загварын хамт хүргүүлнэ.

6.2. Хүсэлт гаргагч нь энэхүү журмын 7.1-д заасан мэдэгдлийг хүлээж авснаас хойш 30 хоногийн дотор тохирлын гэрчилгээ болон гэрээний загварт холбогдох мэдээллийг тусган, баталгаажуулж ирүүлнэ.

6.3. Энэхүү журмын 7.2-д заасан хугацаанд гэрээг баталгаажуулж ирүүлээгүй тохиолдолд гаргасан шийдвэрийг цуцална.

Долоо. Магадлан хяналт

7.1. Зохицуулах хороо нь тохирлын гэрчилгээ авсан тоног төхөөрөмжүүдэд тохирлын үнэлгээний шаардлагыг үргэлжлүүлэн хангаж байгаа эсэхийг магадлан хяналт хийх замаар нотолж, баримтжуулна.

7.2. Зохицуулах хороо нь магадлан хяналтыг дараах байдлаар хийнэ.

7.2.1. бүртгэлд суурилсан,

7.2.2. эрсдэлд суурилсан,

7.2.3. бодит байдалд суурилсан.

7.3. Зохицуулах хороо нь “Мэдээлэл, харилцаа холбооны тоног төхөөрөмжийг баталгаажуулах схем”-д магадлан хяналт хийхээр заагдсан тохирлын гэрчилгээ эзэмшигчдэд тохирлын гэрчилгээ авснаас хойш нэг жилийн дараагаас эхлэн жил бүр магадлан хяналт хийнэ.

7.4. Тохирлын гэрчилгээтэй холбоотой гомдол, маргаан үүссэн тохиолдолд энэхүү журмын 9.3-д заасан хугацааг харгалзахгүйгээр тохирлын гэрчилгээ эзэмшигчдийн үйл ажиллагаанд магадлан хяналт хийж болно.

7.5. Магадлан хяналтыг явуулахаас өмнө тохирлын гэрчилгээ эзэмшигчид урьдчилан мэдэгдэнэ.

7.6. Магадлан хяналтын үр дүнд үл тохирол илэрсэн тохиолдолд залруулах хугацаа өгөх ба тухайн хугацаанд үл тохирлыг арилгаагүй бол тохирлын гэрчилгээг хүчингүй болгоно.

7.7. Тохирлын гэрчилгээ хүчингүй болсон тухай шийдвэрийг Зохицуулах хорооны цахим хуудас, Стандартчилал, техникийн зохицуулалтын асуудал хариуцсан төрийн захиргааны байгууллагад мэдэгдэнэ.

Найм. Тохирлын гэрчилгээг хүчингүй болгох

8.1. Тохирлын гэрчилгээ эзэмшигчийн хүсэлт эсхүл магадлан хяналтын дүнг үндэслэн тохирлын гэрчилгээг хүчингүй болгоно.

8.2. Тохирлын гэрчилгээ эзэмшигчээс давтан үнэлгээ хийх хүсэлт ирээгүй бөгөөд тохирлын гэрчилгээний хүчинтэй хугацаа дууссан бол уг тохирлын гэрчилгээний хугацааг дуусгавар болсонд тооцно.

Ес. Бусад

9.1. Зохицуулах хороо нь тохирлын тэмдэгийг оюуны өмчийн эрхтэйгээр бүртгүүлж ашиглах ба дотоодод үйлдвэрлэсэн эсвэл экспортлох тоног төхөөрөмжид заавал тавигдах ба бусад тохиолдолд сайн дурын үндсэн дээр тохирлын тэмдэгийг хэрэглүүлнэ.

9.2. Зохицуулах хороо нь баталгаажуулалтын шийдвэр болон хүчин төгөлдөр тохирлын гэрчилгээ эзэмшигчдийн мэдээллийг цахим хуудаст байршуулж, нээлттэй мэдээлнэ.

----- оОо -----

“Мэдээлэл, харилцаа холбооны тоног төхөөрөмжийг
баталгаажуулах журам”-ын
Нэгдүгээр хавсралт

**МЭДЭЭЛЭЛ, ХАРИЛЦАА ХОЛБООНЫ ТОНОГ ТӨХӨӨРӨМЖИЙГ
БАТАЛГААЖУУЛАХ СХЕМ**

№	Схемийн дугаар	1	2	3	4	5	6	7
Схемийн хэрэглээ		Импорт дээжтэй	Импорт дээжтэй (түр)	Импорт дээжгүй (түр)	Дотоод	Дотоод (түр)	Экспорт	Импорт дээжгүй
Үйл явц								
Тохирлын гэрчилгээний хугацаа		4 жил	2 жил	1 жил	4 жил	2 жил	3 жил	3 жил
1.	Хүсэлт болон холбогдох материалыг хүлээн авах, иж бүрдэл шалгах	√	√	√	√	√	√	√
2.	Мэргэшсэн шинжээч, ажлын хэсэг томилох	√	√	√	√	√	√	√
3.	Хүсэлтэд дүн шинжилгээ хийх	√	√	√	√	√	√	√
4.	Газар дээрх үнэлгээг хийх				√		√	
5.	Тоног төхөөрөмжийн дээжид радио давтамжийн сорилт туршилт хийх	√	√		√	√	√	
6.	Үнэлгээ хийх, тайлан гаргах	√	√	√	√	√	√	√
7.	Үнэлгээ, тайланд хяналт тавих	√	√	√	√	√	√	√
8.	Дүн шинжилгээ хийх	√	√	√	√	√	√	√
9.	Шийдвэр гаргах, албажуулах	√	√	√	√	√	√	√
10.	Шийдвэрийг мэдэгдэх	√	√	√	√	√	√	√
11.	Тохирлын гэрчилгээ хэрэглэх гэрээ байгуулах	√	√	√	√	√	√	√
12.	Тохирлын гэрчилгээ, гэрээ олгох	√	√	√	√	√	√	√
13.	Баталгаажуулалтын тэмдэг хэрэглэхийг зөвшөөрөх	√	√	√	√	√	√	√
14.	Магадлан хяналт хийх	√	√		√	√	√	√

**МЭДЭЭЛЭЛ, ХАРИЛЦАА ХОЛБООНЫ ТОНОГ ТӨХӨӨРӨМЖИЙГ
БАТАЛГААЖУУЛАХ СХЕМИЙГ АШИГЛАХ ТАЙЛБАР**

№	Тайлбар
Схем 1	Импортын тоног төхөөрөмж, заавал эсхүл сайн дурын баталгаажуулалт хийлгэх хүсэлтэй, дээж ирүүлсэн тоног төхөөрөмжид тохирлын үнэлгээ хийхэд энэхүү 1 дүгээр схем хамаарна: ▪ Хүсэлтийн иж бүрдлийг шалгаж, бүрэн тохиолдолд холбогдох стандарт, норм нормативийн шаардлага хангаж байгаа эсэхэд дүн шинжилгээ хийнэ. ▪ Тоног төхөөрөмжийн дээжид авч радио давтамжийн хэмжилт хийнэ. ▪ Энэхүү журмын 4.3-4.5 дахь заалтууд бүрэн хангагдсан нотолгоонд үндэслэн үнэлгээ, дүгнэлт хийж, тайлан боловсруулна. ▪ Дүгнэлт тайланд хяналт тавьж, баталгаажуулан, шийдвэр гаргана. ▪ Шийдвэрийг мэдэгдэж, тохирлын гэрчилгээ хэрэглэх гэрээ байгуулж, тохирлын гэрчилгээг олгоно. ▪ Тохирлын гэрчилгээний хүчинтэй хугацаа 4 жил байна. ▪ Тохирлын гэрчилгээ олгосноос хойш 1 жилийн дараагаас магадлан хяналт хийнэ.
Схем 2	Импортын тоног төхөөрөмж, заавал эсхүл сайн дурын баталгаажуулалт хийлгэх хүсэлтэй, харилцан хүлээн зөвшөөрөх хэлэлцээрт нэгдэн орсон орны итгэмжлэлийн тогтолцооноос хамаарч нэг сорилт туршилтын дүн байхгүй дээж ирүүлсэн тоног төхөөрөмжид тохирлын үнэлгээ хийхэд энэхүү 2 дугаар схем хамаарна: ▪ Хүсэлтийн иж бүрдлийг шалгаж, бүрэн тохиолдолд холбогдох стандарт, норм нормативийн шаардлага хангаж байгаа эсэхэд дүн шинжилгээ хийнэ. ▪ Тоног төхөөрөмжийн дээжид авч радио давтамжийн хэмжилт хийнэ. ▪ Энэхүү журмын 4.3, 4.5 дахь заалтууд хангагдсан бөгөөд харилцан хүлээн зөвшөөрөх хэлэлцээрт нэгдэн орсон улсын итгэмжлэлийн тогтолцооны онцлогоос хамаарч 4.4 дэх заалтын 2 сорилт туршилт хийгдсэн нь Үндэсний стандарт, норм нормативтай нийцэж байгаа нотолгоонд үндэслэн үнэлгээ, дүгнэлт хийж, тайлан боловсруулна. ▪ Дүгнэлт тайланд хяналт тавьж, баталгаажуулан, шийдвэр гаргана. ▪ Шийдвэрийг мэдэгдэж, тохирлын гэрчилгээ хэрэглэх гэрээ байгуулж, түр тохирлын гэрчилгээг олгоно. ▪ Түр тохирлын гэрчилгээний хүчинтэй хугацаа 2 жил байна. ▪ Түр тохирлын гэрчилгээ олгосноос хойш 1 жилийн дараагаас магадлан хяналт хийнэ. ▪ Түр тохирлын гэрчилгээг нэг удаа олгоно.
Схем 3	Импортын тоног төхөөрөмж, заавал эсхүл сайн дурын баталгаажуулалт хийлгэх хүсэлтэй, харилцан хүлээн зөвшөөрөх хэлэлцээрт нэгдэн орсон улсын итгэмжлэлийн тогтолцооноос хамаарч нэг сорилт туршилтын дүн байхгүй, дээж ирүүлэх боломжгүй тоног төхөөрөмжид тохирлын үнэлгээ хийхэд энэхүү 3 дугаар схем хамаарна:

	▪ Хүсэлтийн иж бүрдлийг шалгаж, бүрэн тохиолдолд холбогдох стандарт, норм нормативийн шаардлага хангаж байгаа эсэхэд дүн шинжилгээ хийнэ. ▪ Энэхүү журмын 4.3, 4.5 дахь заалтууд хангагдсан бөгөөд харилцан хүлээн зөвшөөрөх хэлэлцээрт нэгдэн орсон улсын итгэмжлэлийн тогтолцооны онцлогоос хамаарч 4.4 дэх заалтын 2 сорилт туршилт хийгдсэн нь Үндэсний стандарт, норм нормативтай нийцэж байгаа нотолгоонд үндэслэн үнэлгээ, дүгнэлт хийж, тайлан боловсруулна. ▪ Дүгнэлт тайланд хяналт тавьж, баталгаажуулан, шийдвэр гаргана. ▪ Шийдвэрийг мэдэгдэж, тохирлын гэрчилгээ хэрэглэх гэрээ байгуулж, түр тохирлын гэрчилгээг олгоно. ▪ Түр тохирлын гэрчилгээний хүчинтэй хугацаа 1 жил байна. ▪ Түр тохирлын гэрчилгээг нэг удаа олгоно.
Схем 4	Дотоодын үйлдвэрлэлийн тоног төхөөрөмж, заавал эсхүл сайн дурын баталгаажуулалт хийлгэх хүсэлтэй, дээж ирүүлсэн тоног төхөөрөмжид тохирлын үнэлгээ хийхэд энэхүү 4 дүгээр схем хамаарна: ▪ Хүсэлтийн иж бүрдлийг шалгаж, бүрэн тохиолдолд холбогдох стандарт, норм нормативийн шаардлага хангаж байгаа эсэхэд дүн шинжилгээ хийнэ. ▪ Тоног төхөөрөмжийн дээжид авч радио давтамжийн хэмжилт хийнэ. ▪ Тоног төхөөрөмжийг үйлдвэрлэж буй үйлдвэрлэлийн явцад газар дээрх үнэлгээг хийнэ. ▪ Энэхүү журмын 4.3-4.5 дахь заалтууд бүрэн хангагдсан нотолгоонд үндэслэн үнэлгээ, дүгнэлт хийж, тайлан боловсруулна. ▪ Дүгнэлт тайланд хяналт тавьж, баталгаажуулан, шийдвэр гаргана. ▪ Шийдвэрийг мэдэгдэж, тохирлын гэрчилгээ хэрэглэх гэрээ байгуулж, тохирлын гэрчилгээг олгоно. ▪ Тохирлын гэрчилгээний хүчинтэй хугацаа 4 жил байна. ▪ Тохирлын гэрчилгээ олгосноос хойш 1 жилийн дараагаас магадлан хяналт хийнэ.
Схем 5	Дотоодын үйлдвэрлэлийн тоног төхөөрөмж, заавал эсхүл сайн дурын баталгаажуулалт хийлгэх хүсэлтэй, үйлдвэрлэлийн үйл явцад үнэлгээ хийх боломжгүй, дээж ирүүлсэн тоног төхөөрөмжид тохирлын үнэлгээ хийхэд энэхүү 5 дугаар схем хамаарна: ▪ Хүсэлтийн иж бүрдлийг шалгаж, бүрэн тохиолдолд холбогдох стандарт, норм нормативийн шаардлага хангаж байгаа эсэхэд дүн шинжилгээ хийнэ. ▪ Тоног төхөөрөмжийн дээжид авч радио давтамжийн хэмжилт хийнэ. ▪ Энэхүү журмын 4.3-4.5 дахь заалтууд бүрэн хангагдсан нотолгоонд үндэслэн үнэлгээ, дүгнэлт хийж, тайлан боловсруулна. ▪ Дүгнэлт тайланд хяналт тавьж, баталгаажуулан, шийдвэр гаргана. ▪ Шийдвэрийг мэдэгдэж, тохирлын гэрчилгээ хэрэглэх гэрээ байгуулж, тохирлын гэрчилгээг олгоно. ▪ Түр тохирлын гэрчилгээний хүчинтэй хугацаа 2 жил байна. ▪ Түр тохирлын гэрчилгээ олгосноос хойш 1 жилийн дараагаас магадлан хяналт хийнэ.

	▪ Түр тохирлын гэрчилгээг нэг удаа олгоно.
Схем 6	Экпортод гаргах зорилготой дотоодын үйлдвэрлэлийн тоног төхөөрөмж, заавал эсхүл сайн дурын баталгаажуулалт хийлгэх хүсэлтэй, дээж ирүүлсэн тоног төхөөрөмжид тохирлын үнэлгээ хийхэд энэхүү 6 дугаар схем хамаарна: ▪ Хүсэлтийн иж бүрдлийг шалгаж, бүрэн тохиолдолд холбогдох стандарт, норм нормативийн шаардлага хангаж байгаа эсэхэд дүн шинжилгээ хийнэ. ▪ Тоног төхөөрөмжийн дээжид авч радио давтамжийн хэмжилт хийнэ. ▪ Тоног төхөөрөмжийг үйлдвэрлэж буй үйлдвэрлэлийн явцад газар дээрх үнэлгээг хийнэ. ▪ Энэхүү журмын 4.3-4.5 дахь заалтууд бүрэн хангагдсан нотолгоонд үндэслэн үнэлгээ, дүгнэлт хийж, тайлан боловсруулна. ▪ Дүгнэлт тайланд хяналт тавьж, баталгаажуулан, шийдвэр гаргана. ▪ Шийдвэрийг мэдэгдэж, тохирлын гэрчилгээ хэрэглэх гэрээ байгуулж, тохирлын гэрчилгээг олгоно. ▪ Тохирлын гэрчилгээний хүчинтэй хугацаа 3 жил байна. ▪ Тохирлын гэрчилгээ олгосноос хойш 1 жилийн дараагаас магадлан хяналт хийнэ.
Схем 7	Импортын тоног төхөөрөмж, заавал эсхүл сайн дурын баталгаажуулалт хийлгэх хүсэлтэй, дээж ирүүлэх боломжгүй тоног төхөөрөмжид тохирлын үнэлгээ хийхэд энэхүү 7 дугаар схем хамаарна: ▪ Хүсэлтийн иж бүрдлийг шалгаж, бүрэн тохиолдолд холбогдох стандарт, норм нормативийн шаардлага хангаж байгаа эсэхэд дүн шинжилгээ хийнэ. ▪ Энэхүү журмын 4.3-4.5 дахь заалтууд бүрэн хангагдсан нотолгоонд үндэслэн үнэлгээ, дүгнэлт хийж, тайлан боловсруулна. ▪ Дүгнэлт тайланд хяналт тавьж, баталгаажуулан, шийдвэр гаргана. ▪ Шийдвэрийг мэдэгдэж, тохирлын гэрчилгээ хэрэглэх гэрээ байгуулж, тохирлын гэрчилгээг олгоно. ▪ Тохирлын гэрчилгээний хүчинтэй хугацаа 3 жил байна. ▪ Тохирлын гэрчилгээ олгосноос хойш 1 жилийн дараагаас магадлан хяналт хийнэ.

--- оОо ---